



書經蔡傳旁通

四

三六三

服部文庫

117

151

4



書蔡氏傳旁通卷之二



後學 東匯澤 陳 師凱 譔
後學 豫章 朱 萬初 校正

○禹貢

夏后氏五十而貢貢者較數歲之中以爲常。

朱子云夏氏一夫受田五十畝而每夫計其五畝之入以爲貢。

禹別九州非用其私智天文地理區域各定故星土之法則有九野。

周禮保章氏云以星土辨九州之地所封封域皆有分星以觀妖祥注云星土星所主土也鄭司農說星土以春秋傳曰參為晉星商主大火國語歲之所則我有周之分野之屬是也玄謂大界則曰九州州中諸國之封域於星亦有分焉其書亡矣堪輿雖有郡國所入度非古數也今其存可言者十二次之分也星紀吳越也玄枵齊也姤訾衛也降婁魯也太梁趙也實沈晉也鶉首秦也鶉火周也鶉尾楚也壽星鄭也太火宋也析木燕也疏云古黃帝時堪輿亡故其書亡矣又云吳越在南

齊魯在東今歲星或北或西不依國地所在者此古之受封之日歲星所在之辰國屬焉故也吳越二國同次者亦謂同年度受封故同次也又案史記正義引星經云角亢鄭之分野兗州心房心宋之分野豫州尾箕燕之分野幽州斗牛吳越之分野揚州女虛齊之分野青州危室壁衛之分野并州奎婁魯之分野徐州胃昂趙之分野冀州畢觜參魏之分野益州井鬼秦之分野雍州柳星張周之分野三河翼軫楚之分野荊州以九州言則為九野以十二州言則為十二野

壺口。今隰州吉鄉縣。

寰宇記云。在慈州吉鄉縣西南五十里。今改吉州。隸平陽路。

呂梁山。在今石州離石縣東北。

寰宇記呂梁在離石北。以東可二百餘里。今隸太原路。

岐山。在今汾州介休縣狐岐之山。

今隸太原路。

六壁城。在勝水之側。

勝水。寰宇記在汾州孝義縣南一里。六壁府。後魏。

大平真君五年。討胡於六壁。即此城也。俗以城有六面。因以為名。在孝義縣西八里。今仍屬汾州。廣平曰原。今河東路太原府也。

寰宇記為并州。今為太原路屬河東山西道。

太岳。在河東郡彘縣東。今晉州霍邑也。

寰宇記太岳在霍邑縣東三十里。晉州。宋改平陽府。今仍之霍邑。今改為霍州。

山南曰陽。則今岳陽縣地也。堯之所都。

岳陽縣。今屬平陽路。

汾水。出於太原。經於太岳東入于河。

今案汾河在山西當云西南入河地志云北山汾水所出西南至汾陰入河

覃懷地名今懷州也

今為懷孟路屬河東山西道

涑水出乎其西

地志涑水出代郡廣昌東南行五百里至容城入河今案容城屬涿郡在幽州之境去懷孟南北懸絕涑水不應在懷孟之西涑字恐是濟字之誤

漳水二一出上黨治縣大黽谷

上黨今潞州也治字誤地志作沾師古音它廉反

韻會亦作沾寰宇記音丁念反

今平定軍樂平縣少山也各為清漳

寰宇記云少山一名河逢山在縣西南十里清漳水出焉平定完顏金改為州今屬河東山西道

一出上黨長子縣鹿谷山

長讀為長短之長

今潞州長子縣發鳩山也各為濁漳

寰宇記發鳩山在縣西南六十五里濁漳水出焉然縣別有鹿谷山非鹿谷即發鳩也漳水一名潞水今潞州為平陽路支郡

東北至阜城入北河

地志東北至邑成入大河

鄴今潞州涉縣也

涉縣今屬真定路

阜城今定遠軍東光縣也

今並有阜城東光二縣皆屬景州為河間路支郡

周官大司徒辨十有二壤之物而知其

種以教稼穡樹藝

注壤土也釋云此十二壤即上十二土注云十二

土分野十二邦上繫十二次各有所宜也疏云分

別物之所生而知其所殖之種遂即以教民春稼
秋穡以樹其木以藝其黍稷也
以土均之法辨五物九等制天下之地
征

亦大司徒文也注云均平也五物五地之物也九
等駢剛赤緹之屬疏云制天下之地征者言天下
則并畿外邦國所稅入天子而言也五物即上山
林川澤之等是也愚案上文云辨其山林川澤丘
陵墳衍原隰之名物注云積石曰山竹木曰林注
瀆曰川水鍾曰澤土高曰丘大阜曰陵水厓曰墳

下平曰衍高平曰原下濕曰隰
草人糞壤之法駢剛用牛赤緹用羊墳
壤用麋渴澤用鹿

地官草人云掌土化之法以物地相其宜而為之
種凡糞種駢剛用牛赤緹用羊墳粉壤用麋渴
澤用鹿鹹渴用豕勃壤用狐墳石壚用豕
疆上樂呼覽反用黃扶云反輕嬰反用犬注云土化
之法化之使美也凡所以糞種者皆謂煮取汁也
赤緹線色也線七緹反渴澤故水颺也渴鹵也豕豕他
也勃壤粉解者墳壚粘疏者疆樂堅強者輕嬰

輕脆者鄭司農云用牛以牛骨汁漬其種也謂之
糞種黃麻也疏云案禹貢冀州云白壤青州云白
墳兗州云黑墳徐州云赤墳揚州荆州云塗泥
豫州云墳壚梁州云青黎雍州云黃壤與此駢剛
之屬為九等不同者以禹貢自是九州大判各為
一等此九等者無妨一州即有此九等之類故不
同也

土會之法
大司徒云以土會古外反之灋辨五地之物生一曰
山林其動物宜毛物其植物宜阜物阜音早其民毛

而方。二曰川澤。其動物宜鱗物。其植物宜膏物。其民黑而津。三曰丘陵。其動物宜羽物。其植物宜麋。核物。其民專。團而長。四曰墳衍。其動物宜介物。其植物宜萊物。其民皙而瘠。五曰原隰。其動物宜羸物。其植物宜叢物。其民豐肉而庠。注云。阜物。柞栗之屬。膏物。楊柳之屬。理致白。如膏。玄謂膏當為橐。蓮芡之實有橐鞞。

天子所自治。并與場圃園田漆林之類。而征之。如周官載師所載賦。非盡出於田也。

地官載師云。以廛里任國中之地。以場圃任園地。以宅田士田賈田任近郊之地。以官田牛田賞田牧田任遠郊之地。以公邑之田任甸地。以家邑之田任稍。去地。以小都之田任縣地。以大都之田任。曷地。凡任地。國宅無征。園廛二十而一。近郊十一。遠郊二十而三。甸稍縣都皆無過十二。唯其漆林之征二十而五。

常山郡

今真定路。

定州曲陽縣

定州今改中山府曲陽隸保定路中山屬真定路
東入滹水

地志應劭曰滹音驅驅侯反

瀛州高陽縣

瀛州今為河間路高陽縣今隸安州屬保定路

真定府行唐縣東流入于滋水

行唐今隸保定滋水去縣三十六里

衛水東入滹沱河

寰宇記滹沱水在靈壽縣西南二十里

大陸孫炎曰鉅鹿北廣阿澤河所經也

鉅鹿即邢州今為順德路鉅鹿為屬縣寰宇記云
廣阿澤一名大陸一名鉅鹿一名大麓一名沃州
在縣西北五里其澤東西二十里南北三十里

澶相

宋澶州今改開州隸大名府相州今名彰德路

蓋禹河自澶相以北皆行西山之麓班

馬王橫皆謂載之高地

此西山指太行山也迤北連綿直至趙州以上接

恒山皆在河北之西其地常高於河

古河之在貝冀以及枯涿之南

貝州今改恩州為廣平路支郡冀州為真定路支郡案程氏禹貢圖古涿渠自邢州來過貝州北至冀州之東禹河自相州來經貝冀之南過涿水及其已過信涿之北

信字下脫都古二字案此段自程氏曰以下皆禹貢圖叙說之文傳寫脫二字耳信都冀州也古涿即枯涿也其北則趙深二州之境

隋改趙之昭慶以為大陸縣唐又割鹿城置陸澤縣

寰宇記昭慶本漢廣阿縣大業未改為大陸縣天

寶十三年又改為昭慶縣唐舊書謂天寶元年改為昭慶唐舊書又云深州陸澤先天二年分饒陽鹿城界置陸澤縣至德二年改鹿城為東鹿寰宇記云陸澤本漢廣阿縣地隋象城縣地唐開元中置以大陸澤為名貞元中以饒陽立深州至長慶已後移深州理於是邑今案饒陽改隸晉州而深州理靜安其大陸鹿城並未詳沿革然皆不出漢之廣阿也蔡傳本陸澤多訛為陸渾非是邢趙深三州為大陸邢州則有廣阿澤趙州則有大陸縣深州則有陸


澤縣故總言之。

碣石。地志在北平郡驪城縣西南河口之地。今平州之南也。

地志作驪成無河口之地四字。碣作揭師古音。稜寰宇記今平州理盧龍縣本漢遼西肥如縣也。碣石山在縣南二十三里。碣然而立在海旁。太康地志云秦築長城起自碣石在今高麗舊界非此碣石也。又平州石城縣在盧龍西一百四十里有碣石。始皇刻石漢武登之當山嶺有大石如柱號曰天橋柱立於巨海之內平州今改名平灤路仍理

盧龍西至大都五百五十里。驪城光武時省廢今無之。

漢遼東西右北平漁陽上谷之地。



萬津。寰宇記云。在樂陵東西北。流入饒安。

在樂陵縣西三里。

許商云。在萬縣。

高齊天保七年併入安德縣。

漢世近古。止得其二。

許商所稽是。

唐人遂得其六。

馬頰。覆輔。鈞盤。并許商所云為六。

輿地記又得其一。

簡潔

鄭氏求之不得。以為齊桓塞其八流。以自廣。

爾雅注疏云。鄭玄云。周時齊桓公塞之。同為一河。今河間弓高以東。至平原菑津。往往有其遺。虺。春秋緯寶乾圖云。移河為界。在齊呂填闕八流。以自廣。鄭玄蓋據此文。謂齊桓公塞之。故蔡氏以為無稽也。

夫曲防。齊之所禁。

孟子注云。不得曲為隄防。壅泉激水。以專小利也。

惟程氏以為九河之地。已淪於海。

此段自漢以來。講求九河。至論終。皆程氏叙說成文。惟鄭氏一段。非故此。以程氏更端下云。平州正南有山。而名碣石者。尚在海中。去岸五百餘里。愚案程氏本意。非謂去平州岸五百里。乃去滄州岸五百里耳。蓋去平州岸。只二十三里。無許遠也。

漢王橫言。

溝洫志。王莽時。大司空掾王橫言。往者天嘗連雨。東北風。海水溢。西南出。寢數百里。九河之地。已為海所漸矣。禹之行河水。本隨西山下。東北去。

周譜云定王五年河徙則今所行非禹所穿也。

雷夏地志在濟陰郡城陽縣西北。

地志作成陽寰宇記作郝陽此作城誤。

今濮州雷澤縣西北。

今無雷澤縣澤在濮州鄆城縣屬濟寧路。

汭水。

說文注臣鉉曰今作汭非是皮變反案寰宇記陳留縣下云睢溝在縣東南五里輿地志云汭水自滎陽受睢水東至陳留彭城南入泗水自後開通濟渠此渠廢今無水據此則蔡氏以汭為濼以睢

為沮皆合其滎陽則會同之地也睢音權音濼音楚音汭音。

沛國芒縣。

地志芒莫郎反光武改為臨睢隋改為朮城即今歸德府朮城縣也。

沮有楚音。

韻會在呂反丘各。

祭之地地墳。

見左傳僖公四年。

西北多山東南多水。

先天之位。良為山。居西北。故西北多山。兗為澤居
東南。故東南多水。

兗徐揚三州最居東南下流。

兗承河濟下流。徐承淮泗下流。揚承江漢下流。

潞水出東郡東武陽至千乘入海。

地志云行千二十里東武陽今濮州朝城縣也千

乘今益都路樂安縣也。

程氏以為此乃漢河與潞殊異然亦不
能明言潞河所在未詳其地也。

案程氏貢道圖云潞出東郡東武陽縣至漢後受

河於武陽縣東南太抵東北行至千乘入海此河
乃漢河元非禹河愚案程氏意非指潞為漢河蓋
言今自潞入河處所受河水乃漢以後所徙頓丘
之河非禹時澶相以北之河也其潞水仍以東武
陽為是料河水未徙之前其自潞入河處則又過
武陽以北之地也即無與潞殊異之文故不別言
潞所在耳。

岱泰山在今襲慶府奉符縣

襲慶府今為兗州完顏金又於奉符縣置泰安州
並屬山東濟寧路。

嶠夷今登州之地。

今登州為般陽路支郡在東海之濱東北西三面皆距海。

濰水出琅琊郡箕縣今密州莒縣東北濰山也。

完顏金於首縣置首州屬益都路。

北至都昌入海今濰州昌邑也。

地志作昌都今濰州屬益都路。

淄州淄川縣。

今淄州改為般陽路仍理淄川而泰安州又自

有萊蕪縣。

東至博昌縣入濟今青州壽光縣也。

濟地志作沛青州今為益都路屬山東壽光仍隸

錯蓋別為一物如磬錯之錯。

韻會云錯鑢也又云鑢摩錯之也朱子云磋以鑢錫蔡傳後云磬錯治磬之錯也。

即今萊州之地。

在東海之濱隸般陽路。

汶水出泰山郡萊蕪縣原山今襲慶府萊蕪縣也。

萊蕪今改屬泰安州。

鄆州中都縣。

鄆州今為東平路無中都縣有汶上縣

沂水出泰山郡蓋縣艾山今沂州沂水縣也。

蓋地志音古盍反今沂水割屬莒州

南至于下邳西南入于海。

地志行六百里下邳今邳州也。

水出尼丘山

在今兗州泗水縣。

武陽之冠石山。

在今濮州朝城縣地志云行九百四十里至下邳

入泗。

有濼。

說文云水在魯昔郭反寰宇記云源出費縣東南連青山下西南入徐州滕縣界。

沂沐。

沐食聿反寰宇記云沐水出沂州沂水縣西北沂山東南入泗水。

沂州費縣。

寰宇記云蒙山在縣西北八十里高四十里長六十九里。

海州朐山縣

寰宇記在縣西北九十里。餘所殛處下有羽淵。今海州名海寧州。仍理朐山為淮東淮安路支郡。朐音渠。

大野在今濟州鉅野縣

濟州今升為濟寧路。鉅野為倚縣。寰宇記云東西百餘里。南北三百里。

濟水至乘氏縣分為二

乘氏舊屬曹州。今廢。寰宇記云漢乘氏縣在鉅野縣西南五十里。劉宋時廢。程氏禹貢圖云水經既於封丘分南北濟。又於乘氏分為二。必有一誤。封丘今隸汴梁路。

東原漢之東平國。今之鄆州也。

搏埴之工

搏音團。拍也。埴時職。反黏土也。出考工記。埴埴以為器。出老子十一章埴始然反和也。

周書作雜

此汲冢周書第四十八篇也。下文本見度邑篇。古書誤以二篇合為一耳。

其壘

本書壘作疆。孔晁注云：疆疆疊塗。案此書傳刻訛舛。正如晁注四字，亦不可解。大槩疆者指其壇耳。壇之五方以五色土各隨其方疊塗之也。壘則四旁起埒如墻，無置黃土之剋。當以疆字為是。壘以醉反。

鑿取其方面之土，苞以黃土，苴以白茅。

以為土封

孔晁云：其方土謂建東方諸侯以青土也。苞覆苴裹土封，封之為社也。

葛嶧山

寰宇記：嶧陽山在下邳縣西六里。西征記：下邳城西五里有葛山，禹貢所謂嶧陽山也。下邳今邳州。

西北陪尾山

寰宇記：在泗水縣東。

西南過彭城

彭城今徐州，屬河南省。

襲慶府泗水縣

今為兗州泗水縣

下邳有石磬山

石磬當乙作磬石。寰宇記輿地要覽皆作磬石山。在下邳西南八十里。寰宇記云泗水中無此石。其山在泗水之南四十里。今取磬石上拱樂府其山出石大小擊之其聲清亮。恐禹治水之時水至此山矣。

濠泗楚皆貢淮白魚

濠州今為臨濠府泗州。仍泗州楚為淮安路。

及期而大祥

及當作又

中月而禫

禫徒感反。說文云除服祭名也。鄭玄云澹澹然平安之意。文公家禮曰大祥後中月而禫。中月間一月也。二十五日祥後便禫。

以之為袞所以祭也

左傳疏云祭服玄衣纁裳。詩稱玄袞是玄衣而畫以袞龍袞之言。卷也。謂龍首卷然。其五也。以之為端所以齋也。

春官司服云。士之齋服。有玄端素端。鄭司農云。玄衣有襦裳者。為玄端。鄭玄謂端取其正也。以之為冠。以為首服也。

王藻云。玄冠丹組。纓諸侯之齋冠也。玄冠素組。纓士之齋冠也。論語云。羔裘玄冠。不以弔。

許慎曰。汜水受陳留浚儀陰溝。至濛為澼水。東入于泗。則淮泗之可以達于河者。以澼至于泗也。

自淮入泗。至彭城入澼。澼之上流即汜水也。至浚儀入陰溝。自陰溝而後北入河也。

泗之上源自沛。亦可以通河。沛泗水而北。至溢為滎。入河。滎水即沛水也。沛古濟字。

彭蠡地志在豫章郡彭澤縣東。東字誤。地志作西。漢彭澤今南康之都昌。江州之湖口彭澤皆其地也。彭蠡在三縣之西南。

跨豫章饒州南康軍三州之地。豫章今龍興路也。此湖南至龍興之新建。東至饒之鄱陽。西至南康之建昌。星子北至都昌。

夏小正。

夏時之書子夏傳

松江

寰宇記云松江在蘇州吳縣自太湖出海屈曲七
百里又名吳江又名松陵又名笠澤

併松江為三江

愚按以此為三江固賢於衆說然亦不合東為中
江東為北江之文蓋松江出於太湖之下已與大
江不相附近而婁江東江又為松江支流不過為
太湖水口耳其於岷江漢邈乎其不相關也若
以漢江在荊州之域不當如東坡三江之說而又

不必涉中江北江之文而止求其利病之在揚州
之域者則水勢之大者莫若揚子大江松江浙江
三者耳經文記彭蠡之下何為直捨大江而遠錄
湖水之支流也唐氏之言未敢遽信然蔡氏主之
者以其地有三江之名且合吳起春秋之語捨此
他說愈妄故取之耳然導水所謂中江北江則不
在此也愚又思之恐三江有二不可合而論之三
江既入一也中江北江二也本不相合
震澤太湖也在吳縣之西南五十里今
蘇州吳縣也

蘇州今浙西平江路也。太湖縱廣二百八十里。周廻六百五十四里。為地三萬七千頃。其中有洞庭山。夫椒山。洞庭即包山。山有洞庭寶室。入地下潛通五嶽。見寰宇記。

如三川震之震。

三川震國語文。

榘梓豫章之屬。

榘皮連切。豫章木名。吳都賦作榘樟。

葛越木綿之屬。

吳都賦蕉葛升越弱於羅紉。注云蕉葛布之細者。

升越越布之細者。說文云葛絺綌草也。韻會云越草名蒲屬。葛越草布也。

吳始開邗溝。隋人廣之。而江淮舟船始通。

寰宇記云揚州江都縣合瀆渠在縣東二里。本吳掘邗溝以通江淮之水路也。昔吳王夫差將伐齊北霸中國。自廣陵城東南築邗城。城下掘深溝。謂之邗江。亦曰邗溝。邗河干切。

江漢合流于荆。去海尚遠。

据禹迹圖自江漢合流至海洋一千八百餘里。

長沙下雋。

地志雋字亮切。寰宇記作雋。郡國志作雋。

巴陵瀟湘之淵在九江之間。

洞庭湖記云。沅澧之交。瀟湘之會。九江之間。

岳州巴陵。

今隸湖廣行省。

沅水。

郡國志云。出牂牁。且蘭縣。地志云。行二千五百三十里。東南至益陽入江。說文云。出蜀郡。由牂牁至長沙入洞庭湖。且子閭切。且蘭。今播州境也。益陽

州。屬潭州路。

漸水。

地志。武陵郡。索縣。漸水。東入沅。索縣。光武時廢。未詳其地。

元水。

漢志。在武陵郡。無陽縣。字或作沅。源出牂牁郡。故且蘭縣。南入沅。或名巫水。又曰无水。又名濞水。濞水。舞水。聲之訛也。今蔡傳作元亭。之元者。字之訛也。

辰水。

地志出武陵郡辰陽縣三山谷行七百五十里入沅沅寰宇記作三嵎山谷在今辰州路淑浦縣

叙水

地志云武陵郡義陵縣鄜梁山序水所出西入沅鄜音敷寰宇記作叙水鄜梁作鈿梁在今辰州路淑浦縣

酉水

地志出武陵郡充縣酉原山行千二百里入沅沅今辰州路沅陵縣有小酉山酉溪

澧水

地志出武陵郡充縣歷山行千二百里入沅沅今澧州路澧陽縣也

資水

地志出零陵郡都梁縣路山行千八百里入沅沅都梁今湖南武崗武崗縣也

湘水

地志出零陵郡零陵縣陽海山行二千五百三十里入江江零陵今湖南永州路零陵縣也

漢志九江在廬江郡之尋陽縣

地志云禹貢九江在南皆東合大江大江案漢之尋陽

縣治在今蘄州界內地名蘭城在江北而地界管至江南今江州之德化德安二縣皆其地也。

九江之名。

今自蘄州而下至尋陽小水入大江者固不一。然並無一名如舊冀之九河遷徙不時至漢尚有可考者大江南北山隴界限千古不移而反無一名存焉可知其說之妄而不足憑也。

今詳漢九江郡之尋陽乃禹貢揚州之境。

謂九江之尋陽亦誤尋陽在漢屬廬江不屬九江。

九字恐誤秦置九江郡在壽春今安豐路有壽春縣而臨濠府光州和州皆其地也漢之廬江郡則今安慶無為皆其地也無為有廬江縣今之江州在漢則為尋陽縣及豫章郡之柴桑縣王莽時劉歆誤指彭蠡為九江遂使莽改豫章為九江郡改柴桑為九江亭而又改壽春之九江為延平郡於是九江之名始遷於江南矣東漢九江仍治壽春廬江仍治舒尋陽仍隸而柴桑仍隸豫章晉改九江為淮南郡惠帝元康元年割揚州之豫章鄱陽廬陵臨川南康建安晉安荊州之武昌桂陽安成

合十郡。因江水之名而置江州。初理江北岸。地名蘭城。在今蘄州界內。後溫嶠移於淦城。宋興元年分廬江之尋陽武昌之柴桑置尋陽郡。屬江州。元帝渡江。尋陽郡又置九江上甲二縣。尋又省九江入尋陽。安帝義熙八年省尋陽縣入柴桑縣。柴桑仍為郡。愚案尋陽縣即今德化也。柴桑即今瑞昌也。而今之德安則又尋陽柴桑之二境也。寰宇記云九江在江州西北二十五里。名曰白馬江。則又以為一江而無九名矣。又史記正義曰九江郡都陰陵。陰陵故城在濠州定遠縣西六十五里。

東陵。今之巴陵。

屬岳州。

南郡。枝江縣。

今江陵路屬湖北。

華容縣。

屬岳州路。

若潛水。則未有見也。

王氏炎曰。案隋志南郡松滋縣有潛。即古潛字。今松滋分為潛江縣。屬江陵路。

江夏。安陸。

江夏縣屬鄂州安陸古鄂州也今為安陸府而德安府亦有安陸縣雲夢在其南

左傳楚子濟江入于雲中

定四年

又楚子以鄭伯田于江南之夢

昭三年

別而言之則二澤也

江南曰夢江北曰雲朱子云江陵之下岳州之上

是雲夢

弩者中矢鏃之用

今江西吳城龍廟中有東城所藏石弩一枚色青而質堅長可四寸

肅慎氏貢楛矢石弩

事見國語

董安于之治晉陽

事見國語

所以供祭祀縮酒之用

疏云束茅立之祭前酒沃其上酒滲下若神飲之

故謂之縮

齊桓公責楚貢包茅不入

見左氏僖四年。

又管子云江淮之間一茅而三春九名曰菁茅。

見輕重丁篇。

辰州麻陽縣苞茅山出苞茅。

見寰宇記今麻陽縣隸沅州。

組綬類。

崔豹古今注云漢舊制乘輿黃赤綬四采黃赤縹緋淳黃為圭長二丈九尺九寸五百首。

大龜尺有二十寸。

史記龜策傳云龜千歲滿尺二十寸。

捨舟而陸以達于洛。

程氏圖荆貢陸行向洛在襄陽北光化鄧州之間。

熊耳在商州上洛縣。

商州今為陝西奉元路支郡。

弘農盧氏之熊耳非是。

今嵩州盧氏縣屬河南府路。

河南縣西北有古穀城縣其北山實瀍水所出。

北山即名穀城山瀍水出其下。

澗水出廣陽山。

寰宇記云一名澗池山。

河南府河南縣。

今理洛川縣。

澗池縣。

今割屬陝州。

濟水自孟州温縣入河。

今之懷孟路。

滎在鄭州滎澤縣西。

滎澤今屬汴梁路。

敖倉者古之敖山也。

寰宇記云書言仲丁遷于囂詩言搏獸于敖春秋云敖邠之間漢書云東據敖倉即此地秦時築倉於山上故曰敖倉。

今濟水但入河不復過河之南。

寰宇記云古者濟水出河北截河南流而為滎澤自王莽末濟水但入河不復過河南。

鄭康成謂滎今塞為平地。

見春秋傳閔二年注程氏云春秋衛侯及狄人戰于滎澤然則在春秋時既可以戰則已不復受河。

引河東南以通淮泗

河水溢出為滎東南流為濟為汭南入泗泗入淮

濟水分河東南流漢明帝使王景即滎

水故瀆東注浚儀謂之浚儀渠漢志謂

滎陽縣有狼蕩渠首受濟者是也南曰

狼蕩北曰浚儀其實一也

程氏禹貢圖云受河之水至漢陽武縣分流其一

汎南下者自中牟原圃之東越大梁未至則為官

渡官渡亦名沙水沙讀如蔡即蔡河也班固著

蕩渠於滎陽而曰首受沛東南至陳留入潁者即

此汎也亦戰國之謂鴻溝而楚漢分境者也既至

陳留蔡河正汎之外支脉散布遽為三名其在開

封浚儀之北者為浚儀渠稍東為汭又東行至蒙

為獲獲至彭城北遂入于泗此從大梁之北而數

乏為北來第一水也

其浸波澆

澆側駕反

荷澤在定陶縣今濟陰縣

今二縣皆屬曹州荷澤在濟陰縣曹州即興仁府

也。

東過宛句縣

句音劬。今濟陰縣地。

孟諸在睢陽縣東北

今歸德府。即宋之南京。宋州。古之梁國。仍理睢陽。

今南京虞城縣西北孟諸澤是

今虞城。割隸濟州。屬濟寧路。

岷山在蜀郡湔氐道西徼外

湔子于反。氐于奚反。道者出徼之路。縣之領夷者。名曰道。如剛氐道。平陰道。嚴道。隸道之類。徼吉弔。

反徼猶塞也。東北謂之塞。西南謂之徼。

在今茂州汶山縣江水所出也

今為成都路支郡。地志云。江水出嶓山。東南至江都。入海。行二千六百六十里。

青城天彭諸山

青城天彭一山。皆在今灌州。天彭亦名灌口山。寰宇記云。李冰以秦時為蜀守。謂汶山為天彭。闕灌州舊名。末康軍。

嶓冢山。地志云。在隴西郡氐道縣。漾水所出。又云。在西縣。

案地志不云嶓冢在氏道但言漾水所出至武都為漢於西縣下却云嶓冢山西漢所出南入廣漢白水又於武都下云東漢水受氏道水一名沔過江夏謂之夏水據此則有西東二漢水其嶓冢則不言出漾而即言西漢所出其氏道則又即言漾水而不言有嶓冢分而為二則不合經文故蔡氏合兩出而並言之

今與元府西縣三泉縣也蓋嶓冢一山跨于兩縣云

寰宇記西縣本後魏嶓冢縣也又云嶓冢山在三

泉縣東二十八里又云漾水一名漢水一名沔水源出嶓冢山今與元路屬陝西省而西縣三泉皆無之未詳沿革

江沱在成都府郫縣

郫音疲今仍為縣

永康軍導江縣

今軍名灌州縣廢州隸成都路

已郡宕渠縣潛水

宕徒浪反今東川蓬州地也

渠州流江縣

流江今廢渠州隸四川東道

瀟水出洋州真符縣

洋州今隸興元路縣廢

蔡山在雅州嚴道縣蒙山在雅州名山縣

二縣並未詳沿革當在今嘉定路之西二百里

沫水

史記音妹漢書音本末之末

蜀郡太守李冰

秦時人

和川

在雅州嚴道縣西去吐蕃大渡河五百程

羅岫州

寰宇記作羅繩巖古蠻州

巴郡魚復縣

地志復音腹

恨山縣

地志屬武陵郡孟康曰恨山音恒

如周官田一易再易之類

周禮云一易之田家二百畝再易之田家三百畝

一易者間一歲耕百畝也。再易者間二歲耕百畝也。

後世蜀之卓氏程氏以鐵冶富擬封君。

史記蜀卓氏即鐵山鼓鑄富至僮千人擬於人君程鄭亦治鑄富埒卓氏俱居臨邛。

毳毛織之可以為罽。

毳昌芮反獸毛之細者罽居例反。據說文織皮為罽。罽布為罽並居例反。

西傾在洮州臨潭縣。

今為臨洮府屬陝西鞏昌路縣革。

葭萌。

地志屬廣漢郡宋屬利州今為廣元路綿谷昭化二縣皆其地也。

漢沔。

地志如淳曰沔陽人謂漢水為沔水師古曰漢上曰沔。

晉壽。

宋名利州今為廣元路屬四川南道。至于褒水逾褒而暨于衙嶺之南溪灌于斜川屈于武功而北以入于涓。

地志扶風郡武功縣斜水出衙嶺山北至郿入渭
褒水亦出衙嶺至南鄭入沔斜弋奢反衙音牙郿
音媚褒城斜谷南鄭皆在今陝西興元路武功今
屬陝西乾州

漢武帝時人有上書欲通褒斜道及漕
事見史記河渠書

南陽上沔入褒

史記正義云南陽今鄧州案今自有南陽府

弱水在張掖郡刪丹縣

地志云桑欽以為道弱水自此西至酒泉合黎後

漢志云張掖在維陽西四千二百里褒字記云東
南至洛陽三千三百里今為甘州路又有山丹州
即刪丹也後魏曰山丹並隸甘肅行省刪丹山名
一名焉支山

魏太武擊柔然至粟水西行至菟園水
又循弱水西行至涿邪山

柔然即蠕蠕如充反事見通鑑宋文帝元嘉六年

北史載太武至菟園水分軍搜討

出蠕蠕傳云菟園水去平城三千七百餘里東至
瀚海西接張掖水北度燕然山東西五千餘里南

北三千餘里。

程氏據西域傳以弱水為在條支其說非是。

程氏云自西漢以來指言弱水之地其顯著者凡六而班固地志已三出矣條支一也酒泉崑崙二也張掖刪丹本桑欽說以為西至酒泉合黎三也自漢志以外賈耽以張掖郡之張掖河當之唐史以小勃律之娑夷河東女之康延川當之其多如此臣惟取條支媯水之西入西海者以應經文而他皆不取為其地望不與經合也經曰弱水既西

桑賈班三家所稱皆不出乎甘肅兩州之間其水未嘗西流故臣深所不據而本漢書初通西域時長老所傳條支弱水以為經證其水西流注于西海以聲教該及四海者繫之故敢主其說

原州百泉縣岍頭山。

漢書作開頭山寰宇記作筭頭史記作鷄頭在今陝西涇州界內而原州今為鎮原州。

末興軍高陵縣。

末興今陝西奉元路。

渭州渭源縣烏鼠山。

渭州今為平涼府渭源屬臨洮府

船司空

縣名地志云本主船之官遂以為縣名今廢

華州華陰縣

今隸奉元路

隴州汧源縣弦蒲藪有汭水

今屬鞏昌路

漆水自耀州同官縣來

耀今改輝州

沮水在坊州宜君縣

今宜君割屬鄜州

坊州昇平縣

坊州理中部縣今州廢中部撥屬鄜州而昇平亦併入宜君縣

併入宜君縣

耀州華原縣合漆水

縣今華寰宇記云合漆水入富平石川河

至同州朝邑縣入渭

同州今屬奉元路

又漆水出扶風縣

今鳳翔府扶風縣

岐山普潤縣

鳳翔二縣也。今岐山仍隸鳳翔普潤葦。

澧水出末興軍鄠縣

末興奉元也。鄠音戶。

至咸陽縣入渭

縣屬奉元。

耀州富平縣掘陵原

縣屬輝州。

終南在末興軍萬年縣

完顏金改萬年為咸寧。今為奉元倚縣。

扶風武功縣

武功今屬乾州。

地志古文

古文者。班固時古地理書也。班固引之。故稱古文。

原隰在邠州

屬陝西。

武威縣東北有休屠澤。古今以為豬野

屠音除。故匈奴休屠王地也。古今當作古文。

涼州姑臧縣

今西涼州屬甘肅行省。

三危在燉煌

燉徒門反。今沙州路屬甘肅省。輿地要覽云：三危山有三峯，俗名昇兩山。後漢西羌傳注亦云：三危在沙州。

昆侖虛

虛音墟。爾雅疏云：帝之下都。昆侖之虛方八百里。即崑崙山也。

琅玕石之似珠者

爾雅注云：狀似珠。山海經曰：崑崙山有琅玕樹。注：琅玕子似玉。

積石在鄯州龍支縣

鄯州在長安之西一千九百九十三里。龍支縣在鄯州南一百三十五里。積石山又在縣南。宋時鄯蘭二州俱廢。今復置蘭州屬陝西省。鄯在蘭西四百九十里。

龍門在河中府龍門縣

河中屬河東山西道縣。

熙河路

宋神宗改鎮洮軍為熙州。以熙河洮岷州通遠軍為一路。

會州西小河

會州在長安之西北一千一百九十里。今屬陝西鞏昌路。

興州

今四川南道沔州也。屬廣元路。廣元古利州也。今河北亦有興州。管宜興與安二縣。未知孰是。

小河鹹水

其地生鹽。去州一百二十里。

西安州之東大河分為六七道

西安即鹽州。在今甘肅省地面。

崑崙即河源所出在臨羌

此據地志也。臨羌漢屬金城郡。山在今甘肅省肅州路境內。寰宇記云。肅州酒泉縣崑崙山。在縣西南八十里。馬定言禹貢崑崙在臨羌之西。即此明矣。

折支在河關西千餘里

河關縣名。地志屬金城郡。寰宇記云。即涼州也。

渠搜近朔方之地也

地志中部都尉所治。屬朔方郡。

隴州吳山縣吳嶽山

寰宇記云秦都咸陽以為西嶽故稱吳嶽山在古
縣西南五十里隴州今隸陝西縣革
隴州汧源有岍山岍水所出
岍記皆作汧在縣西六十里案寰宇記以吳岳與
岍山為二山
晁氏以為今之隴山天井金門秦嶺山
者皆古之岍也

據上文有二說故引此合言之寰宇記隴山在隴
州汧源縣西六十二里天水大坂也張衡云欲往
從之隴坂長其坂九廻不知高幾許欲上者七日

乃得越絕高處可容百餘家下處容十萬戶東望
秦川四五百里極目泯然墟宇桑梓與雲霞一色
人上隴者想還故鄉悲思而歌有絕死者秦嶺寰
宇記云在隴州隴安縣西南

雷首在今河中府河東縣

寰宇記云在縣南三十里此山有九名謂歷山首
山薄山襄山甘棗山渠豬山獨頭山陟山等之名
又名雷首又名首陽

砥柱在今陝州陝縣三門山是也

今屬河南府路寰宇記云禹理洪水山陵當水者

破之以通河。三穿既決，河出其間，有似門，故俗號
三門。又案文苑英華，趙冬曦三門賦云：砥柱山之
六峯者，皆生河之中流。蓋夏后之所開鑿，其最北
有兩柱相對，距崖而立，即所謂三門也。次于其南
有孤峯，揭起峯頂，平闊夏禹之廟在焉。西有孤石
數丈，圓如削，成復次，其南有三峯，東曰金門，中曰
三堆，西曰天柱。湍水從黃老神前東流，湍激蹙于
蝦石，折流而南，激于三門。苞于廟山，乃分為四流，
淙于三峯之下，抵于曲隈，會流東注，加以兩崖夾
水，壁立千仞，盤紆激射，天下罕比。

濩澤

地志濩，烏號反，輯纂音胡郭反，非是。

析城，在今澤州陽城縣。

今澤州為平陽路支郡，寰宇記云：在縣西南七十五里。

王屋，今絳州垣曲縣也。

今為平陽路支郡，寰宇記又云：王屋在澤州陽城縣南五十里，有僊宮，號小有清虛洞天山，高八千丈。

太行，在今懷州河內。

今懷孟路寰宇記云在縣北二十五里太行山首於河內北至幽州凡百嶺綿亘十二州之界有不徑連山中斷謂之徑也

恒山今定州曲陽

定州今改中山府曲陽割屬保定路

河北諸山根本脊脉皆自代北寰武嵐憲諸州乘高而來

愚案河北之山皆從白登山來白登之南為管涔山汾水出其下管涔汾水之東為代為憲西為嵐而山之支分從此始白登在今河東山西道大同

路白登縣管涔在今太原路管州界內白登之東諸水東趨于海西為大河其山脊正東西分水處也其脊以西之水則西流以入龍門西河之上流

自龍門受汾水入河北至應州之西以及古東受降城于千六七百里皆受山脊西流之水

其脊以東之水則東流而為桑乾幽冀以入于海

南自趙深河間以北至平州如滏水濡水沾水易

水等皆東趨于海桑乾音干河在今朔州鄯陽縣

冀疑當作薊

其西一支為壺口太岳

案禹迹圖壺口在汾水之西太岳在汾水之東則

壺口太岳不同一支

次一支包汾晉之源而南出以為析城

王屋而又西折以為雷首

自管涔東趨太原又南為羊頭山迤西為太岳又

南為析城汾晉皆在其西迤東為王屋別折一支

西為雷首抵河

又次一支乃為太行

自羊頭山分而之東在沁水之北潞水之南沁于

浸反

又次一支乃為恒山

自白登山正東而來與真定府相近數十里

王鄭有三條四列之名皆為未當

王肅鄭玄也王以岍岐至碣石為北條西傾至陪

尾為中條嶧冢至敷淺原為南條鄭以岍岐為正

陰列西傾為次陰列嶧冢為次陽列岷山為正陽

列

朱圉。在秦州。大潭縣。

秦州。今屬鞏昌路。縣華。

太華。在華州。華陰縣。

今屬奉元路。

方。潁川郡。密高山。有密高山。古文以為外。

地志云。是為中岳。有太室少室山廟。密古崇字。

西京。登封縣。

今河南府路。登封縣。嵩高山也。

桐栢。在唐州。桐栢縣。

唐州。今為河南府路支郡。縣華。

陪尾。今安州。安陸。

今江陵路。德安府。安陸縣也。

荆山。今襄陽府。南漳縣。

今作南漳。

內方。今荆門軍。長林縣。

今荆門。改州。屬江陵路。

漢陽軍。漢陽縣。北大別山。

今為岳州路。散府。縣華。

衡山。今潭州。衡山縣。

衡山

衡山

衡山

今洞庭之南湘水之西資水之東衡州之北
敷淺原地志豫章郡歷陵縣南有傅易
山。

師古曰。傳音敷。易音陽。

今江州德安縣博陽山也。

在廬山之西。

晁氏以為在鄱陽者非是。

鄱陽本在彭蠡之東。今經文止言過九江至于敷
淺原不更言過彭蠡也。故非是。

然所謂敷淺原者其山甚小而卑惟廬

阜最高曰大宜當紀志恐山川之名古
今或異。

案江州圖經南康郡志皆言周成王時有匡俗結
廬隱居此山之西北後因名其山曰廬山或曰匡
山。又曰匡廬審如此說則周以前固未嘗名廬山
安知其初不名敷淺原及既稱廬山之後而舊名
得專之於支麓小阜乎。

岷山之脉其北一支為衡山而盡於洞
庭之西其南一支度桂嶺北經表筠之
地至德安所謂敷淺原者二支之間湘

水間斷

自岷至敷淺原論其山脊綿直道里甚遠今直曰其北一支為衡山亦宋也蓋岷山之南為沫若水所限東北又限於涪墊大江諸水其岡脊支脉乃遶行而西自西而南至雲南之境又東趨夜郎已四千餘里乃越五溪之尾至湖南為衡山則又二千五百餘里矣其南一支自桂嶺至零陵為九疑山下郴州迤東北而行經袁州筠州之間筠今瑞也又下為幕阜白藤高良諸山乃至南康江州之境大為廬山小為傳易抵于江而止其自桂而來

又二千餘里矣其去衡山則信乎為湘水所隔而不通也。

合黎山在張掖縣西北亦名羌谷

即今甘州路也弱水亦在其地寰宇記云合黎水一名羌谷鮮水案隋志不云亦名羌谷惟寰宇記有此名又以為水不以為山恐言山則獨名合黎言其下水則兼名羌谷也漢志有羌谷水

流沙在沙州西八十里

即今江肅省沙州路也案五代史晉天福二年高居誨使于闐還記其山川云自靈州過黃河三十

里始涉沙入党項界曰細腰沙。神樹沙至三公沙。自此沙行四百餘里至黑堡沙。沙尤廣。自葑州西始涉磧磧無水。西北五百里至肅州。渡金河出至門關。至瓜州沙州。瓜州南十里鳴沙山。冬夏殷殷有聲如雷。云禹貢流沙也。又東南十里三危山。云三苗之所竄也。

又案山水皆原於西北。

先天卦位。艮西北。兌東南。故水聚東南而尾西北。山聚西北而尾東南。所謂山澤通氣也。黑水出犍為郡南廣縣汾關山。

犍音乾。犍為故夜郎國也。黑水地志名符黑水。犍為今叙州等處。宣撫司所轄。湖路富順州長寧軍等處地也。今嘉定府亦有犍為縣。

唐樊綽云。西夷之水南流入于南海者凡四。曰區江。曰西苒河。曰麗水。曰彌浩。江皆入于南海。其曰麗水者。即古之黑水也。三危山臨峙其上。

浩字。字書所無。惟唐李華弔古戰場文中有此一字。而讀者無定音。寰宇記。永江軍導江縣下有此字。音如夜。反然非彌浩也。程氏禹貢圖皆作彌諾。

恐蔡傳誤書言為三點當從程本程氏云唐樊綽咸通中從辟安南親行交趾得其水道曲折載之蠻書其大川南流而入于南海者四西珥河與蘭倉江合一也麗水與瀾諾江合二也新豐川合勃弄諸水三也唐蒙所見盤江四也其謂麗水者緯指言其水正為黑水而邏些城北有山即三危山也四水與蔡傳同異

西珥河者却與漢志葉榆澤相貫

葉榆屬漢益州郡

又漢滇池即葉榆之地武帝初開滇僑

時其地古有黑水舊祠

滇音顛滇池縣地志云屬益州郡武帝元封二年開故滇王國也滇池澤有黑水祠舊先樂反滇國今雲南行省所管地也

其地在蜀之正西東北距宕昌不遠宕昌即三苗種裔

北史云宕昌羌者其先蓋三苗之胤其地東接中華西通西域南北數千里

孟津今孟州河陽縣亦名富平津

河陽孟之倚縣古書多作盟津盟亦音孟寰宇記

云或謂之富平津又謂之小平津
洛水在河南府鞏縣之東

河南即古洛陽

山再成曰伍
爾雅云山再成英注云兩山相重書云至于大伍
疏云山上更有一山重累者名伍

張揖鄭玄臣瓚云云

此皆據爾雅疏文又本漢書注云

今通利軍黎陽縣臨河有山蓋大伍也
此正據瓚說寰宇記云在縣南七里又名青檀山

通利今為州為大名路支郡

修武武德

古懷州二縣武德今革

成臯

今汴梁路鄭州汜水縣故虎牢之地也

洛水今冀州信都縣枯洛渠也

今冀州為真定路支郡信都為倚縣

魏郡鄴縣有故大河在東北

鄴今彰德路也

古洛瀆自唐貝州經城北入南宮貫穿

信都

貝今恩州也。南宮信都皆冀州屬縣。

自大伍而下。根岸高於平地。故決齧流移。水陸變遷。

水高於地。故為隄以障之。隄壞則河決。此所以有水患也。輯纂引方氏云。建炎紹興後。黃河決入鉅野。溢于泗。以入于淮者。謂之南清河。由汶合濟至滄州。以入海者。謂之北清河。是時淮僅受河之半。金之亡也。河自開封北衛州決而入渦河。以入淮。一淮水獨受大黃河之全。以輸之海。濟水之絕于

王莽時者。今其源出河北溫縣。猶經枯黃河中。以入汶。而後趨海。清濟貫濁河。遂成厓論矣。

唐張仁愿所築東受降城。

唐神龍三年。置在雲中之地。有東西中三城。今皆廢。

漢水有兩源。

程氏謂東源正嶓冢。導漾東流為漢。其西源乃嘉陵江。自利州已上數百里。不為東流。與經不合。以漢高帝置廣漢郡。而因誤曰嘉陵之水為西漢水也。蔡傳則畧不及嘉陵水。而以東漢為漾之下流。

西漢為沔之下流。二漢復合流東行以入大江也。
程說非是。

武當縣北四十里。漢水中有洲曰滄浪。

洲水曰滄浪水。
縣屬均州。今為襄陽府路支郡。寰宇記謂水在均州。鄭鄉縣即漁父棹歌處。

三澨。郢州長壽縣。

郢州今改安陸府屬荆湖北道。

復州景陵縣。

復州今為沔陽府屬荆湖北道。

番陽澤在江之南。

番音都。在南康之東南。饒州之西北。

去漢水入江。虺已七百里。

自南康至漢陽。

所蓄之水。則合饒信徽撫吉贛南安建昌臨江表筠龍興南康數州之流。

饒信徽在江東。餘十郡在江西。饒有餘干水。鄱江水。信有弋陽水。貴溪水。徽之婺源有婺源水。撫有汝水。臨川水。吉有吉水。贛有章水。貢水。南安之南康縣有益漿水。封侯水。良熱水。建昌南城縣有盱水。

臨江之新淦州有淦水。袁有宜春水。筠瑞州也。高安縣有蜀水。龍興富州有豐水。南康建昌州有脩水。已上諸水下流皆入鄱陽湖。

入江之剋西則廬阜東則湖口皆石山峙立水道狹甚。

西則廬阜之麓名江基東則湖口之雙石鍾山相去一呼今名唐石渡。

廬江之北有所謂巢湖者。

今湖在淮西無為州廬江縣北三十五里一名焦湖大江在縣東南百九十里。

合東匯北匯之文。

愚謂以巢湖當彭蠡信合東匯北匯之文不知番湖之懸絕然一湖之下均為一江以達于海必竟無中江北江之分也。諸家惟知求彭蠡而不知求中江北江。蔡傳辨論最悉雖未見其的姑亦傳疑而已。

濟水絳州垣曲縣。

屬平陽路。

東出孟州濟源縣。

屬懷孟路。寰宇記云濟水在縣西北三里平地而

出有二源皆繚以周墻

號公臺

在孟州温縣俗名賀酒臺

再成曰陶在今廣濟軍西

爾雅疏云丘形上有兩丘相重累者名陶丘廣濟軍即今曹州定陶縣也

濟陰縣自有荷沘

亦屬曹州

合汶水今青州博興縣

今博興州隸益都路

李賢謂濟自鄭以東貫滑曹鄆濟青以入于海

鄭州滎陽郡也隸河南行省滑州隸大名路曹州

隸濟寧路鄆州今東平路濟州今濟寧路齊州今

濟南路青州今益都路

樂史謂今東平濟南淄川北海界有水流入海謂之清河

見寰宇記孟州濟源縣下淄川今般陽路也北海今益都路也云實荷澤汶水合流亦曰濟河

歷城之西蓋五十里而有泉湧出高或

致數尺。其旁之人。名曰酌突之泉。

歷城縣。今屬濟南路。酌北角反。廣韻云。足擊也。輯纂音方車反。非是。

灤水。

音鹿。

舟之通于濟者。

曾集濟作齊。

東阿。

縣屬東平。

淮水出南陽平氏縣胎簪山。

平氏縣廢山在今唐州界內地志云淮入海行三千二百四十里。

地志云鳥鼠山者同穴之枝山也。

案地志隴西郡首陽縣云禹貢鳥鼠同穴山在西南渭水所出東至船司空入河行千八百七十里不言鳥鼠為同穴之枝山也。

盧氏之熊耳。

嵩州盧氏縣也。

九州之山槎木通道已可祭告。

案益稷言隨山刊木此言九山刊旅必隨其山而

刊之導山是其序也其所行有九節導岍及岐至于荆山一也壺口雷首至于太岳二也砥柱析城至于王屋三也太行恒山至于碣石四也西傾朱圉鳥鼠至于太華五也熊耳外方桐栢至于陪尾六也導嶓冢至于荆山七也內方至于大別八也岷山之陽至于衡山至于敷淺原九也是蓋施工次第九節非論山脉也亦非以配九州也

九州之川濟滌泉源而無壅遏九州之川非一而其所滌之源有九施工次第因而序焉導弱水一也導黑水二也導河積石三也

嶓冢導漾四也岷山導江五也導沅水六也導淮自桐栢七也導渭自鳥鼠同穴八也導洛自熊耳九也亦是施工九起非以配九州也

九州之澤已有陂障而無決潰

九州之澤非一其雲土夢作又及大陸既作皆可耕治不待陂障餘為陂障者亦有九焉雷夏既澤一也大野既豬二也彭蠡既豬三也震澤底定四也九江孔殷五也滎波既豬六也導滄澤七也被孟豬八也至于豬野九也此特言其已有陂障者耳非若職方氏分為九州澤藪之比也

如周大司徒以土宜之法辨十有二土之名物以任土事

十二土分野十二邦各有所宜也。

如周大司徒辨十有二壤之名物以致稼穡

致當作教注云壤亦土也以萬物自生則言土以人所耕而樹藝則言壤。

錫之士以立國錫之姓以立宗左傳所謂天子建德因生以賜姓胙之土而命之氏

輯纂引林氏云如契封於商賜姓子稷封於邵賜姓姬有王有姓昔固有矣至是徧錫之唐陸淳春秋纂例云姓則百代不易唯天子迺得特賜姓故曰因生以賜姓舜賜禹姓曰姒伯夷曰姜武王賜胡公姓曰媯是也又曰胙之以土而命之以氏舜賜禹曰夏伯夷曰呂是也又天子之子例以謚配字傳伯文伯宣叔襄仲之類是也而後代子孫因以其字為氏示所出不亂所謂別子為祖也自餘則或以官以邑為其氏族以自分別凡此皆如近代之論房也鄭夾深氏族畧云三代之前姓氏分

以謚加文。武哀繆。莊僖康宣是也。十八曰以爵氏。如王叔。王孫。公子。公孫是也。十九曰以國係。如唐孫氏。滕叔氏是也。二十曰以族係。如季孫氏。叔孫氏是也。二十一曰以名氏。如士季氏。伍參氏。韓嬰氏。臧會氏是也。二十二曰以國爵。如夏侯氏。息夫氏。白侯氏是也。二十三曰以邑係。如原伯氏。申叔氏。沂相氏是也。二十四曰以官名。如師延氏。史晁氏。呂相氏。侍其氏是也。二十五曰以邑謚。如苦成氏。二十六曰以謚氏。如臧文氏。二十七曰以爵謚。如成公氏。成王氏是也。二十八曰代北複姓。二十

九曰關西複姓。三十曰諸方複姓。皆夷狄二字姓也。三十一曰代北三字姓。如侯莫陳是也。三十二曰代北四字姓。如自死獨膊是也。右鄭氏之說甚詳。具載通志略。姑節其目。以明姓氏之多門焉。甸服畿內之地五百里者。王城之外。四面皆五百里也。分甸服五百里而為五等。

古者以長三百步為一里。一步六尺。計長一百八十丈也。王城四面皆五百里。是穿心一千里。而王城亦在其中矣。孟子所謂天子之田方千里。周禮

所謂方千里曰王畿皆謂是也。以開方法總計之。則為方百里者一百箇也。以此百箇百里分為五等。貢賦則在內四箇百里。納總次外十二箇百里。納銓又次外二十箇百里。納藉又次外二十八箇百里。納粟又最外三十六箇百里。納米。

侯服者。甸服外四面又各五百里也。分侯服五百里為二等。

若併甸服是穿心二千里也。侯服之地開方計之。為方百里者三百。分為三等。則四十箇百里為采地。五十二箇百里為男邦。二百單四箇百里為諸

侯。

綏服者。侯服外四面又各五百里也。分綏服五百里為二等。

若併侯甸是穿心三千里也。綏服之地開方計之。為方百里者五百。分為二等。則在內三百里。為二百七十六箇百里。揆文教在外二百里。為二百二十四箇百里。奮武衛。

要服者。綏服外四面又各五百里也。分要服五百里為二等。

若併綏侯甸是穿心四千里也。要服之地開方計

之為三百里者七百分為二等則在內三百里為
三百九十六箇百里為夷地在外二百里為二百
單四箇百里為蔡罪之地蔡素達反。

荒服者要服外四面又各五百里也分
荒服五百里為二等。

若併要綏侯甸是穿心五千里也荒服之地開方
計之為方百里者九百分為二等則在內三百里
為五百一十六箇百里為蠻地在外二百里為三
百八十四箇百里為流罪之地也合五服五千里之
地總為方百里者二千五百除山川丘陵之類三

分去一之外可建百里之國一千六百餘然禹會
諸侯於塗山執玉帛者萬國蓋并蠻夷君長言之
舉大數耳。

堯都冀州冀之北境并雲中涿易亦恐
無二千五百里藉使有之亦皆沙漠不
毛之地而東南財賦之地則反棄於要
荒以地勢考之殊未可曉。

案禹迹圖堯都平陽今平陽路也甸服五百里其
北則石州太原也南則陝州魏州也東則澤州潞
州也西則鄜州坊州也侯服五百里北則朔州也

南則鄧州之北也。東則濮州也。西則涇州也。綏服五百里。北則雲州之北也。南則房州也。東則淄州也。西則秦州也。要服五百里。北則在大漠之北。南則在江陵之南。東則登州。西則熙州。荒服五百里。南則至湘潭而未及。衡山東逾海。西逾積石而及。流沙。北則去雲中二千二百里矣。凡此所指皆以里數至其境爾。

周制九畿亦五百里。而王畿不在其中。併之則四方相距為萬里。蓋倍禹服之數也。

相距萬里。是百箇百里。開方得萬箇百里。禹服止有二千五百箇。一百里。儘當周服四分之一。乃是周制三倍於禹也。

漢地志亦言東西九千里。南北一萬二千里。

武帝攘却胡越。開地斥境。南置交趾。北置朔方之州。東西九千三百二里。南北萬三千三百六十八里。

○甘誓

其地名。有扈氏國之南郊也。在扶風鄠

縣

寰宇記云秦改為鄆今縣有扈鄉復有扈谷亭又有其亭是也

嚴其坐作進退之節

周禮大司馬中春教振旅以教坐作進退疾徐疏數之節中冬教大閱羣吏各帥其民質明弊旗乃陳車徒如戰之陳皆坐羣吏聽誓于陳前斬牲以左右徇曰不用命者斬之鼓人三鼓羣吏作旗車徒皆作鼓行鳴鑼車徒皆行及表乃止三鼓擁鐸羣吏弊旗車徒皆坐又三鼓振鐸作旗車徒皆行

鼓進鳴鑼車驟徒趨及表乃止坐作如初乃鼓車馳徒走及表乃止鼓戒三闕車三發徒三刺乃鼓退鳴鑼且卻及表乃止坐作如初此可見坐作進退之節矣弊仆也

夏有觀扈商有姚邳周有徐奄

杜預左傳注云觀國今頓丘衛縣觀陸氏音館姚邳二國商諸侯邳今下邳姚西典反徐奄二國皆羸姓

六鄉六鄉之鄉也按周禮鄉大夫每鄉一六鄉六鄉有事出征則各率其

鄉之一萬二千五百人而屬於大司馬
所謂軍將皆卿也。

司馬法曰。王國百里為郊。六鄉在焉。二百里為州。六遂在焉。每鄉萬二千五百家。鄉一人長之。每遂亦萬二千五百家。中大夫一人長之。每軍萬二千五百人。六鄉為正軍。六遂為副軍。六軍共計車十乘。每乘甲士三人。步卒七十二人。通七十五人。則千乘該七萬五千人也。夏官司馬云。王六軍。大國三軍。次國二軍。小國一軍。軍將皆命卿。

三正迭建。其來久矣。舜協時月。正日亦

所以正朔也。子丑之建。唐虞之前。當已有之。

朱子曰。天開於子。地闢於丑。人生於寅。故斗柄建此三辰之月。皆可以為歲首。又語錄云。邵子皇極經世書。一元統十二會。一萬八百年為一會。當初一萬八百年。而天始開。在子會。又一萬八百年。而地始成。在丑會。又一萬八百年。而人始生。在寅會。邵子於寅上方注。一開物字。子丑寅皆天地人之始。故皆可以為正。

左射以取。

葦音騶矢之善者

折馘

折其左耳

詭御

孟子作詭遇謂不正而與禽遇也

禮曰天子巡狩以遷廟主行

曾子問曰古者師行必以遷廟主行乎孔子曰天子巡狩以遷廟主行載于齊車言必有尊也今也取七廟之主以行則失之矣疏云遷廟主新遷廟主也齊車金路也主木主也天子一尺二寸有遷

主者以幣告神而不將幣以出行即埋之兩階之間無遷主者加之以皮圭告於祖禩遂奉以出祖左陽也社右陰也

禮云建國之神位右社稷而左宗廟

秋官司厲怒男子以為罪隸

周禮怒作奴鄭司農云謂坐為盜賊而為奴者輸於罪隸

五子之歌

窮國各拜窮國之君也

左氏襄四年魏絳曰昔夏之方衰也后羿自鉏遷

于窮石。因夏民以代夏政。杜預注云。鉏羿本國名。史記正義引括地志云。故鉏城在滑州衛城縣東十里。晉地記云。河南有窮谷。本有窮氏所遷也。或曰羿善射者之名。

說文一曰射師。羿羽之羿風。謂箭乘風而疾也。賈逵說文。羿帝。嚳射官。故其後善射者皆謂之羿。有窮之君亦善射。故以羿目之也。

左傳注云。羿有窮君之號。小弁之詩。父子之怨。

周幽王娶於申。生太子宜臼。後得褒姒而惑之。信其讒黜申后。遂宜臼。宜臼之傳知其無罪而憫之。故述其情以作小弁之詩。言其自怨慕親之意也。後世序詩者。每篇皆有。小序。

三百五篇之詩。

堯初為唐侯。後為天子。都陶。故曰陶唐。堯授舜。舜授禹。皆都冀州。

寰宇記云。帝堯始封於唐。在太原郡平晉縣北二十里。有故唐城。堯所築也。及為天子。都平陽。平陽即太原。注疏云。堯都平陽。舜都蒲坂。禹都安邑。相去

不盈二百里皆在冀州

典猶周之六典則猶周之八則

周禮天官云一曰治典二曰教典三曰禮典四曰政典五曰刑典六曰事典又云八則治都鄙一曰祭祀二曰法則三曰廢置四曰祿位五曰賦貢六曰禮俗七曰刑賞八曰田役

百二十斤為石二十斤為鈞鈞與石五權之最重者也

五權者銖兩斤鈞石也黃鍾律管容千二百黍重十二銖兩之為兩故一兩重二十四銖十六兩為

斤三十斤為鈞四鈞為石

又按法度之制始於權權與物鈞而生衡衡運生規規圓生矩矩方生繩繩直生準是權衡者又法度之所自出也

見前漢律歷志權與物鈞者孟康云謂鍾與物鈞所稱適停則衡乎也繩直生準者韋昭云立準以望繩以水為平也規矩繩權衡謂之五則準繩連體權衡合德百工繇焉以定法式輔弼執玉以翼天子故詩云秉國之鈞四方是維此法度之所以自出也

○胤征

仲康始即位。即命胤侯以掌六師。次年方有征羲和之命。

經世書以征羲和為仲康元年事。則是即位之次年也。古者逾年改元。

羿廢太康而立仲康。然其篡也。乃在相之世。

左傳注云。禹孫太康淫放失國。夏人立其弟仲康。卒子相立。羿遂代相。

如漢文帝入自代邸。即皇帝位。夜拜宋

昌為衛將軍鎮撫南北軍之類

漢高后崩。呂祿呂產欲作亂。絳侯周勃誅之。大臣迎立代王。王至代邸。即天子位。是為文帝。其夕入未央宮。夜拜宋昌為衛將軍。鎮撫南北軍。漢衛宮之軍在南。為南軍。京城之軍在北。為北軍。南軍者。衛尉寺郎。衛期門府。羽林府。都尉是也。北軍者。中尉府。城門校尉。及八校尉是也。仲康遭夷羿廢立之際。權本在羿。而危疑未定。文帝承大臣迎立之時。尊卑已定。而權已歸已。則仲康之命胤侯也。難文帝之命宋昌也。易。由是觀之。仲康殆勝於文帝。

遠矣。祿產尚存，文帝未必能有為也。

官以職言，師以道言。

非師保之師，如承以大夫師長之師。

辰，日月會次之名。房，所次之宿也。集，漢書作輯，集，輯通用。言日月會次，不相和輯而掩蝕於房宿也。按唐志：日蝕在仲康即位之五年。

一行日度議曰：太康十二年戊子歲，冬至應在女十一度，書曰：乃季秋月朔，辰弗集于房。劉炫曰：房所舍之次也。集，會也。會，合也。不合則日蝕可知。或

以房為房星，知不然者，且日之所在，正可推而知之。君子慎疑，寧當以日在之宿為文。近代善曆者，推仲康時九月合朔，已在房星北矣。按古文集與輯義同。日月嘉會而陰陽輯睦，則陽不疚乎位，以常其明，陰亦含章示冲，以隱其形。若變而相傷，則不輯矣。房者，辰之所次星者，所次之名。其揆一也。新曆仲康五年癸巳歲，九月庚戌朔，日蝕在房二度。炫以五子之歌，仲康當是其一，肇位四海，復脩大禹之典，其五年義和失職，則王命徂征，虞劓以為元年，非也。

古者日蝕則伐鼓用幣以救之春秋傳曰惟正陽之月則然餘則否

莊公二十五年夏六月辛未朔日有食之鼓用牲于社非常也唯正月之朔慝未作日有食之於是乎用幣于社伐鼓于朝注云正月正陽之月夏之四月也

周禮庭氏救日之弓矢

庭氏掌射國中之矢鳥若不見其鳥獸則以救日之弓與月之矢夜射之注云日月之食陰陽相勝之變也於日食則射太陰月食則射太陽朱子詩

傳云日月一歲凡十二會方會則月光都盡而為晦已會則月光復蘇而為朔朔後晦前各十五日日月相對則月光正滿而為望晦朔日月之合東西同度南北同道則月掩日而日為之食望而日月之對同度同道則月抗日而月為之食是皆有常度矣王者修德行政能使陽盛足以勝陰陰衰不能侵陽則日月之行雖或當食而月常避日故其遲速高下必有參差而不正相對者所以當食而不食也若國無政君不用善則陰盛陽微當食必食雖曰有常度而實為非常之變矣

政典先王政治之典籍也。

輯纂引陳氏云政典有司馬掌邦政可據胤侯為大司馬故引之玩其辭意真誓軍旅之辭

諸侯敵愾

愾苦愛反左氏文公四年審武子曰諸侯敵愾王所
愾而獻其功注云敵猶當也愾恨怒也

書蔡氏傳旁通卷之二

